

ILLVSTREM & MAGNIFICVM  
REIPUBLICÆ VRATISLAVIENSIS  
PRÆSIDEM  
DN.

CHRISTIANUM  
ab Hoffmansvvaldau

in Arnolds-Stubhle

Sacræ Cæsareæ Majestatis  
CONSILIARIUM

Castri Namslaviensis  
DIRECTOREM.

*præter omnium vota*

Die 18. April. Anno 1679.

*perenni Civium desiderio*

*rebus humanis placidè exemptum,*

Gloria & Meritis immortalem

*ferali hoc Carminis officio*

ad Conditorium comitabatur

HENRICUS Mühlport.

---

VRATISLAVIÆ,

In Hæredum BAUMANNIANORUM Typographia

exprimebat GODFREDUS GRÜNDEK.





Agnæ Animæ exuvias, diffracta habi-  
tacula carnis,  
Et quantum potuit Libitinæ infringe-  
re cæca  
Sævities, Lacrimas inter planctusq;  
Quiritum,  
Horrisonos gemitus, truncataq; mur-  
mura Vulgi

Efferimus; Mens alta suo contermina Cælo  
Astra supergreditur, plaudens victricibus alis,  
Seque reposcenti jam libera sistit Olympo.  
Ereptus Pater est Patriæ; Nox ingruit atra  
Et circum Tenebræ Tempestatumq; procellæ  
Involvunt trepidas spissâ caligine Mentis.  
Quid querar, aut sileam? Tot in uno Funere condi-  
ngentes Animi dotes, & pondera Rerum.  
PRÆSES enim manibus Charitum limatus ad ungvem,  
Naturæ excellentis Apex, & Meta suprema  
Humani Ingenii, delapsum Ancile Deorum,  
Et conturbatæ Pignus venerabile Breslæ  
Divinos oculos claudit, Lingvæque silenti  
Justitium indicit, toties quæ flectere Cives,  
Quæque Palatinas sacрати Cæsaris aures  
Mulcere, & fandi depromere melq; rosasque  
Sueta, tacet; quanta est, tumulatur Marmore, Suada,  
Quæ valida Herculeis Mentis vincire catenis.  
Depositum prægrande Poli, Vir rebus agendis  
Cælo teste datus, quem mox de Matre cadentem  
Pierides fovere sinu, Lauroque comanti  
Incinxere Caput, qui Cunis jam Jove dignus  
Visus, & innatum generosæ Mentis acumen  
Vix Puer ostendit, mox cum maturior ætas  
Vividiorque calor solidaret corpore nervos,  
Æthera transabit; veluti se fulminis Ales  
Librat, & ardentis radiantia tela diei

A ij

Sustinet



Sustinet immotis oculis, dignamque paterno  
Se probat incubitu; Mentis rapidissimus ardor  
Haurit opes, quas Belga sagax, animosaque Galli  
Horrea habent, Anglusque sinu prægnante recondit.  
More Apis incertas distingvit singula cellas,  
Quæ vitæ civilis iter documenta ministrat,  
Ulterius nec passa moras vis ignea mentis  
Erupit, nobisque diem fulgore sereno  
Imbuit, & Patriæ Lucem, radiosque refundit.  
Arcana Imperiorum, ars abstrusissima Regni,  
Ut modo stringantur, rursus laxentur habenæ,  
Et populus Proteus placido se temperet æquo,  
Nota illi: Zephyris conspirant vota secundis,  
Ut sacrum Patrum numerum, Vultusque verendos  
Impleat, & capiat, meruit quas dextra, secures.  
Scandit Ebur, Veneranda Dice, Jus, Fasque, Fidesque  
Visa latus cinxisse, suamque Astræa bilancem  
Credidit elati manibus terrasque reliquit.  
Non unquam vultu magis est lætata sereno  
Bratesilea Parens sibi quæ præfaga spondit  
Omina fausta status, certa incrementa Salutis.  
Par vigor, & prudens sapienti pectore acumen  
Perplexos rerum nodos, dubiique recessus  
Dissecuit, Maris infidi sat gnarus Vlysses  
Sirenium scopulos, & inhospita littora Civi  
Qui præterveheret, Ponti obluctantibus undis.  
Cunctorum communis amor; Si fasque, rigorque  
Verteret armatas horrenda in crimina leges,  
Ultor, & afflictæ rursus fidissima parti  
Tutela & Portus, cui suspirantis egeni  
Stridula vox, Viduæ lacruma, ætatisque minoris  
Pendens causa strophis, nutum miserentis ocelli,  
Elicuit, justamque malis promptamque medelam.  
Mox ingens patuit Famæ Laudisque Theatrum,  
Percunctos Fortuna gradus raptavit euntem.

Non

Non secus ut mediâ surgit venerabilis Idæ  
Cedrus opaca comis, quæ Cœlum vertice pulsat,  
Quam subter fugiunt Volucres, pictæque cohortes,  
Quamque colunt & mella cavis cœlestia condunt  
Nectaris artifices. Hominum consultus Apollo  
Sic *Hoffmanswaldau* gratam venientibus umbram  
Et creperis Oracla dabat plus Delphica rebus.  
Litibus attritis, & cuncta asperrima passis  
Inter præcipites Pharus extitit alta ruinas.  
Ah quoties toto jactatos æquore, proram  
Post tot naufragii tabulas advertere terris  
Jussit, & in Portus fidâ statione recondi!  
Non tam sollicitè dilectæ Conjugis ora  
Ardet amans, ac ille sacro percussus amore  
Arsit inexhaustis Breslæ emolumenta medullis.  
Non sic virgineum Mater studiosa cubile  
Servat, delusura Procos sub limine stantes;  
Ac Heros Fortunam illibatamque, vigorem  
Nativasque notas decoris, perque omnia sparsum  
Membra Venustatis semper vernantis honorem,  
Affereret, Breslamque suam sine nube serenam  
Virgineam & molli spectaret pace quietam.  
Undique fumabat Belli furialis Enyo,  
Quæ Deus & Cæsar tribuit Chelidonia nobis,  
Civibus Isæo explicuit torrentior amne  
Celsus Atlas *Hoffmanswaldau* Phœnixque Senatus.  
Fama loquax rerum diviso ebuccinet Orbi  
Imperium Augusti pacis dulcedine florens,  
Occlusas Jani valvas, Martisque sacellum,  
Quod secura quies, quod læta licentia plebis  
Aurea Saturni simularit tempora prisca.  
Nil grave, nil durum, nil illætabile falces  
Præsidii videre tui: inconcussa sonarunt  
Templa Dei laudes, Victrix Astræa Tribunal  
Obtinuit, Cives haud fictum nomen Honestas

Moribus



Moribus, obsequiis & vultu & voce probavit.  
Non Titi laus sola fuit servare ruentes,  
Et placido Cives vultu dextraq; beare:  
Plus oculis dilectus erat, propriaq; salutis  
Auspiciis PRÆSES; semel hanc vidisse recentis  
Solati grande instar erat; concurrere Cives,  
Huncq; suum Solem, cunctis per amabile Sidus,  
Indeflexa acies oculorum ubicunq; secuta est.  
Postquam feralis trepidam vox verberat Urbem,  
Quod terræ exosus plusquam servilia Regna  
Spiritus effracto Breslæi Antistitis antro  
Incola sidereæ felix successerit Aulæ,  
In lacrimas Quiris omnis abit, clamorq; ululatusq;  
Exoritur, rabido ungue genas & pectora rumpunt  
Attonitæ Matres, Pueri, innuptæq; puellæ  
Ante fores pullo mœstæ gradiuntur amictu;  
Et, quos fera ætas incurvat prona sepulchro,  
Adveniunt titubante gradu, baculoque tremente  
Et simul ingeminant: Hominum decus atq; Voluptas  
Nostra Salus, nostrumq; Caput, nostra Anchora Vitæ  
Quippe *Hoffmanswaldau* properis immergitur umbris;  
Spiritus imperio qui cuncta movere capace  
Noverat, & quem nos thyrso Pietatis adacti  
Imbibimus, per quem nos vivere cœpimus, ore  
Hauimus, & cunctis animati membra medullis  
Viximus, in tenues fugiens dilabitur auras.  
Quo ruis ô *Patriæ Pater*, ô sanctissime Custos  
Justitiæ, ô Vindex Legum, pars altera Vitæ  
Vel vitâ potior, Leti penetrabile frigus  
Has Charitum sedes Vultus, Themidisque penitral  
Pectus, & os, Suadæ quod Regia viva tenebit.  
Ah liceat gelidis manibus ferre oscula suprema!  
Ah oculos liceat media jam morte natantes  
Claudere, & in nostro paulum halitus ore moretur!  
Nos tibi quod charum est, vel viscera nostra vovemus,  
Mortalis

Mortalis liceat si Vitæ sistere pausam.  
Collacrumans reboat tantis ululatibus æther,  
Imbribus assiduis dans argumenta doloris.  
Sed quorsum me Luctus agit? Mens obruta fluctu  
Tristitiæ, & morbi cruciatibus exsternata  
Non meminit passas ingentia damna Camœnas.  
Haud nostræ tantum Præses venerabilis Urbis,  
Verum toto Helicone Stator, quin totius Orbis,  
Quà modo diffusum cumulata Scientia Lumen  
Sparsit, & ullus honor divinis Artibus extat,  
Præses, & Ingenii Dictator & Arbiter ævi,  
Æternaturos retulit super Astra Triumphos.  
Nutavit Cyrrhæus Apex, tremefactaque Pindi  
Jugera, disruptis fulgur vomuere Cavernis.  
Castalis exiguo vexavit rore lapillos  
Hauustus ab Aonidum fletu, tenuataque passim  
Flumina deseruere sacras Aganippidos undas.  
Permessi ad ripas, resonans ubi vallibus Echo  
Incinuit toties ferali murmure Funus;  
Najades Dryadesque ferunt, longo ordine planctus  
Congeminasse suos, Lauro, vittisque solutis  
Ubera crudeli laniasse in vulnera palmâ.  
Projecit Phœbus cytharam, nervosque rescidit,  
Exosus cantus, damnans vocalia plectra,  
Inque Cupressiferas jusit se vertere silvas,  
Æternas Lauros sacrorum præmia Vatum:  
Nec referat nobis Mæandri flumina mendax  
Græcia, Amyclæi resonantia gutture oloris;  
Præsidis ad Tumulum vastis clangoribus æther  
Cygnorum niveam demisit (credite,) nubem,  
Lugubres canerent qui fracto gutture lessus.  
Plangite vos Cygni, vos carmina plangite Olores,  
Candidior PRÆSES nive, lacte serenior albo,  
Divini Princeps Cantus, mille inter olores  
Sublimi capite, & longâ cervice coruscus

Innu-



Innumeras meruit conferto in agone coronas,  
Quin mihi jam dempta deformis casside Pallas  
Marcentes vultus inarataque Tempora rugis  
Ostentat, queruloque in pectore plurima volvit,  
Et lacrumis major dolor est vitalia rodens.  
Musarum lugente Choro quid restat ad Vrnam  
Quod mea vel Pietas, quodque obsequiosa Voluntas  
Solvere ritè queat? tanto impar Vena dolori  
Enodes numeros, ruptos lumbagine hiatus  
Carminis eluctabitur, & modo trama figuræ  
Corporis ut superest, sic nil nisi pellis & ossa,  
Ingenii maciem frigusque fatebitur ultro.  
Non his Inferiis, non istâ Thuris acerrâ  
Maxime, quos genuit Nutrix mea Bresla, Virorum,  
Afficiendus eras, nec enim fastigia Laudum  
Exæquare potest dextræ ægrotantis Arundo.  
Gloria Te dudum Populis, quâ Sidus utrumque  
Currit, in Exemplum posuit, seclique stuporem,  
Ipse Tibi æternam Meritis post Funera Laudem  
Per tot limatorum operum Monumenta parâsti;  
Ipse Tibi æternos generosi Sangvinis ortus  
In Natis, Patrii qui viva imitamina Vultûs  
Munimenta Domus, & Stirpis fulcra dedisti.  
Si Deus, exæquo, qui nostros temperat annos,  
Exiguas Vitæ tantùm donaverit horas,  
Forte erit illa dies, quâ Te vivacibus odis  
Jure canam, & totum moveam sub Pectore Pindum.

